

Grond interess pils fatgs dall'energia

Repower ha envidau al «Di dalla reit» en siu luvratori niev a Glion

DA HANS HUONDER / ANR

■ La sonda vargada ha Repower presentau siu luvratori niev a Glion. Il medem mument ha l'interpresa dau in'investa en ses engaschaments. Quels pertucan buca mo la produczion, la vendita ed il commerci d'energia, mo-bein era il manteniment dalla reit. Ina gronda part dalla reit locala e regiunala en Surselva ei numnadamein en ses mauns. Cun rodund 450 occupai en Svizra – da quei la gronda part el cantun Grischun – ei Repower in'impurtonta interpresa per pliras regiuns. Aschia era per la Surselva. Rodund 80 persunas ein engaschadas cheu dad ella. Vitier vegnan otg emprendists. Tut en tut porscha Repower la pussevildad da far igl emprendissadi dad otg professiuns. En Surselva dispona la Repower da luvratori a Glion e Mustér. Cheu producescha ella denton era energia cun differentas ovras. La reit da distribuziun d'energia electrica ch'ella survigilescha en Surselva mesira pressapauc 1000 kilometers. Per part sesanfla quella en loghens cun relaziuns topograficas e climaticas difficilas. Oravontut en muments d'incaps ni eveniments dalla natira pretenda quella in engaschament extraordinari dils collaboratur.

Investau nov milliuns francs

Ils davos dus onns ha Repower erigiu ed endrizzau in niev e grond luvratori alla Via Santeri a Glion. Las investiziuns fatgas en quel importan rodund nov milliuns francs. Da cheu anora lavuran 25 collaboratur. Il baghetg dispona da localitads spaziusas per magasins, luvratori, localitads da setener si e sescumiar pils collaboratur sco era biros, stanzas da sedutas e garaschas. Il luvratori che rempiazza per part las localitads alla Via dil Glogn a Glion ei aschidadir la basa da Repower per la Surselva. Sco quei ch'il



Repower ha presentau la sonda vargada siu luvratori niev a Glion. Collaboraturas e collaboratur han orientau davart lur incaricas e lavurs.

FOTO H. HUONDER

responsabel per la comunicaziun, Werner Steinmann, di, survescha l'infrastructura nova al manteniment dils indrezs, surtut denton dalla reit da tensiun bassa ed alta dalla Surselva. El baghetg stattan plazs da lavur moderns a disposiziun per in engaschament da tuttas uras. Sper il luvratori grond a Glion dispona Repower d'in secund luvratori en Surselva, numnadamein a Mustér. «Luvratori gronds sco a Glion ha Repower endrizzau en pli u meins tuttas regiuns d'engaschament pli grondas dil Grischun», di Werner Steinmann.

Parcours cun informaziuns

La sonda vargada ha Repower avierte l'escha e las portas da siu niev luvratori a Glion ed il medem mument dau in'investa

profunda en siu camp da lavur. Collaboraturas e collaboratur han informau ils biars visitaders davart igl engaschament dall'interpresa en Svizra ed egl exterior. Repower ei numnadamein era engaschada ell'Italia, la Germania e la Rumunia. Ultra dallas informaziuns davart las lavurs da projectaziun, construcziun e manteniment dalla reit sco tala ha Repower era orientau las visitaders ed ils visitaders davart entgens projects specials e pli gronds. In da quels pertuca il cataster solar. En entelgientscha cun las vischnauncas eregia Repower comunabla cun in biro d'inschignier in cataster cun tuts baghetgs e las zonas principalas da habitar, denter auter era en Surselva. Sin fundament dallas mesiraziuns e registraziuns che succe-

dan entras ina drona sa vegnir eruiu cun bein ch'il liug ed il baghetg sco tal san survir per la produczion d'energia solara. La drona che sgola per ordinari sin in'altezza da rodund 200 meters fa fotografias dil territori e dils objects. Quellas mesiraziuns, mo era evaluaziuns dil territori, furneschan allura datas precisas cun bein ch'in baghetg ei adattau per exempel per indrezs da fotovoltaiica. La sonda vargada ha Repower denton era orientau davart siu project d'ina ovra electrica cun cotgla ell'Italia. Cun agid d'in model ei la situaziun a Saline Joniche vegnida presentada. L'ovra che sesanfla sper la mar e che vegness furnida oravontut cun cotgla menada neutier cun bastiments pudess producir in sisavel dall'entira energia che vegn producida oz en Svizra.

«Il plascher dalla musica sco finamira principala»

Camp da bands dalla Scola da musica Surselva a Dangio ella Val Blenio

DA HANS HUONDER / ANR

■ Per la quarta ga ha la Scola da musica Surselva arranschau in camp da musica per sias bands a Dangio ella Val Blenio. Sis formaziuns ein stadas l'jamna vargada dalla partida, han profitau dall'instrucziun professiunala e gudiu la cumpignia. Las varga 40 persunas d'instrucziun dalla Scola da musica Surselva instrueschan pressapauc 950 scolaras e scolaras dall'entira regiun. Quei succeda en rodund 30 loghens, la purschida d'instruments ei vasta. Regularmein sestenta la scola denton era da mussar las prestaziuns dallas scolaras e dils scolaras en arranschaments publics. In'otra purschida ei il camp per bands che vegn offerius dapi igl onn 2010 ella Val Blenio. Duront in'jamna san las formaziuns seconcentrar cumpleinamein sin la musica. Persuenter stattan localitads ell'antieriura fabrica da tschugalata Cima Norma a Dangio a disposiziun. Dimora han ils affons e giuvenils el Camp Adula. Per in mudest daner da 450 francs san els guder in'instrucziun professiunala duront in'entira jamna e sededicar cumpleinamein alla musica.

Buna participaziun

Il camp che ha giu liug l'jamna vargada ei vegnius visitaus da sis bands cun tut ensemble 30 dels. «Quellas consistan d'affons e giuvenils ella vegliadetgna da 10 entochen 17 onns», di Corsin Stecher, responsabel pil camp e scolast da musica. Ils siat dis dil camp ein stai stururai claramein. Avonmiezdi ha mintgama giu liug in exercenzi comunabel, suandaus dils exer-

cezis dallas singulas bands en lur locals. Ils magisters da musica Corsin Stecher, Christian Müller, Andreas Conay, Rolf Cafilisch e Natalie Maerten ein sefatschentai alternontamein dallas formaziuns. «Mintga magister ha giu mintga band mintgama in avonmiezdi. Cheutras ei la scolaziun stada varianta e mintga band ha profitau da differentes cussegl ed impuls», di Corsin Stecher che habitescha a Cuera. Cun in referat d'impuls ei il suentermiezdi vegnius lantschus, pli tard han ils affons e giuvenils exercitau danovamein. La sera han las bands allura giu temps e peda da far musica per sesezzas. «Entginas havein nus schizun stuiu supplicar la sera tard da calar da far musica, aschi gronda ei la fascinaziun stada per part», constatescha Corsin Stecher. In concert fin public ei buca vegnius arranschus. Las

bands ein s'entupadas internamein e mintgama ha giu la caschun da presentar entgens tocs e quei senza grond squetsch.

Instrucziun individuala

Essend che las participontas ed ils participonts dil camp ein stai d'ina vegliadetgna denter 10 e 17 onns ha l'instrucziun stuiu vegnir adattada correspudentamein. «Ils giuvenils dil tut havein nus secapescha stuiu instruir auter che quels che sunan gia dapi entgens onns en ina band. Il svilup duront quei camp ei danovamein staus fetg buns e positivs. Naturalmein che nus havein era sentiu il plascher sin l'entira lingia. Il plascher vid far musica ei la fin finala era la finamira principala da quei camp», di Corsin Stecher. Las bands avanzadas han buca mo fatg musica, mo-bein era cumponiu per part. Aschia ha ina

formaziun scret ed exercitau duront quels siat dis buca meins che treis tocs novs. Tier ils giuvenils ei era vegniu mulau vid la tecnica dalla musica dils differentes instruments. Quei ei stau en special la batteria, bass, ghitarra, keyboard e cant. Probabla-mein vegn ei era a dar l'auter onn in tal camp. «Il mument fagein nus ponderaziuns d'arranschar quel duront las vacanzas digl atun. Igl uost ei buc ideals, damai che biars entscheivan igl emprendissadi ni van gia puspei a scola. Quei ha impediù ils commembers da duas bands da separicipar uonn», constatescha Corsin Stecher. Cul camp d'uonn ei il menader fetg cuntents: «Nus havein giu insumma negins incaps e problems. L'aura ei stada fetg buna e la spisa – procurada dad Yvonne Bärtsch – medemamein», puntuescha Corsin Stecher.



LUMNEZIA

In milliun francs per project da giuvenils

(anr/hh) La radunonza communal da Lumnezia ha approbau il venderdis sera ils quens annuals dallas anteriuras vischnauncas da Cumbel, Degen, Lumbrein, Morissen, Suraua, Vella, Vignogn e Vrin. Cun 100 encunter ina vusch ha ella concediu ina contribuziun dad in milliun francs per sustener l'associaziun Miraval (uniun da promover il project da giuvenils Lumnezia) da sviluppar e promover in project social per integrar giuvenils senza occupaziun ellas localitads dalla anteriura casa da vegls e da tgira a Cumbel. La radunonza communal ha priu enconuschientscha dil plan da finanzas dil project per in baghetg da menaschi sigl areal dil lag da senudar Davos Munts e dil credit d'investiziun da 400 000 francs.

Plinavon han vischinas e vischins decidu unanimamein da conceder il dretg da burghes dalla vischnaunca da Lumnezia als consorts Vitor Manuel Dias Barata e Fernanda Maria Da Conceição Fernandes Barata sco era a Vitor Felipe Da Conceição Barata.

VUORZ

Via Andia sto vegnir serrada

(anr) Gievgia, ils 22 d'uost e venderdis, ils 23 d'uost 2013, mintgamai dallas 07.30 entochen allas 18.00, sto la Via Andia sto vegnir serrada sil tschancun Sut Plauncas entochen Vuorz per scadin traffic muort lavurs vid la cuvida. Sco quei che la partiziun dalla tecnica da traffic dalla polizia cantunala cummunichescha exista in sviament signalisau da Rueun a Gulatsch. En cass da schliat'aura vegnan las lavurs refretgas sin gliendisdis, ils 26 d'uost e mardis, ils 27 d'uost 2013. Las colligiazions culs trens a Glion san buca vegnir garantidas.

Chasa d'attempads dastga duvra tutt chombras

■ (rtr) Davent d'immediat dastga la chasa d'attempads a Vella puspè prender si ina persuna dapli e davent da l'emprim da december ulteriuras tschintg persunas. Quai ha Duri Blumenthal, il president communal da Lumnezia, ditg durant la radunanza communal. La primavaira aveva l'Uffizi da sanadad dal chantun Grischun stui reagir perquai che la chasa n'aveva betg avunda personal da tgira.

reclama



Shorley – für natürlich frische Energie
Der erfrischende Durstlöscher aus 60 % Schweizer Apfelsaft und 40 % Passugger-Mineralwasser.
Mosterei Möhl AG
9320 Arbon | Tel. 071 447 40 74 | www.moehl.ch

Ina band duront in exercenzi. Las localitads ell'antieriura fabrica da tschugalata a Dangio ein adattadas per quei intent. MAD